

Serbowstwa (l. 1550, 1750 a 1872) prawje njepodawa. Wona jasnje dopokazuje, kak je R. Andree tola khětro zwjefšnje stawizny serbskeje narodnosće a rěče studował a zo samo na svojich „Wanderstudijach“ tehdy serbske pomjezy dospołnje wobpućował a dokładnje přepytał njeje. Same mnohe němske wjesne mjena su mylnje pisane, kaž n. př. Mallendorf za Mattendorf, Leefkow za Leeskow, Kauden za Rauden, Dauba za Dauban, Drauschwitz za Trauschwitz, Presa za Brösa, Nerack (t. j. serbske Njeradk) za: Neu-Oppitz, Poberschütz za Doberschütz, Gross-Hühnchen za Gross-Hänchen atd. atd. Da-li Bóh, wudam pozdžišo wulku historisko-ethnografisku khartu popřeněmčowanja serbskeje narodnosće po mojich samsnych přepytowanjach, z kotrejež budže kóždy widžeć, zo mój wusud wo Andreeowym džěle přehnaty njeje. Hižo z kharty, kotrež k tejle mojej statisticy přidam, hodža so wšelake wopačnosće na jeho kharće spóznać. — R. Andree-owa kharta bu pomjeňšena tež wudata w Petermannowych „Mittheilungen 1873, Tafel 17“.

8) Historisku khartu cyłeho Serbowstwa (Durinkowje, Serbja a Łužičenjo wot 6.—12. stotka) je Wilhelm Bogusławski zestajał a knizy: „Historija Serbskeho Naroda. Budyšin 1884“ wot njeho a Mich. Hórnik a wudatej přidał. Kharta kaž cyła kniha stej wulcy zajimawej.

9) Na rěčnych a narodnostnych khartach Europy resp. Němcowstwa w nowišim času wudatych smy tež my lužicy Serbja jako wosebity narod woznamjenjeni; su to: a) Physikalisch-statistischer Atlas des deutschen Reiches von Richard Andree und Oscar Peschel, I. Hälfte. Bielefeld-Leipzig 1876, kharta 10: Völkerkarte des deutschen Reiches. — b) Kiepert, Sprachenkarte von Europa; wulka kharta na scěnu wokoło 1877 w Barlinju wudata. — c) Rich. Andree's Allg. Handatlas in 86 Karten. Bielefeld-Leipzig 1881:  $\alpha$ ) kharta 13: Völkerkarte von Europa;  $\beta$ ) kharta 21: Sprachenkarte von Deutschland. Wšě tele kharty su na podložku Boeckhoweje (6) a Andreeoweje (7) kharty džěłane a na nich je Serbam, wosebje delnjołužiskim, khětro wjele kraja wotrězaneho a wurězaneho; samo wokoło městačkow Kulowa a Wojerec stej wulkej němskej kolescy scěhnjenej!

